

Silverwood nem team nung asayartem shimtsü nongloksü

Pakistan nung osangbener ka dak injang agi akha

VOL. XVIII NO. 187 (ADOK 187) DIMAPUR

YANGTEPNÜ (THURSDAY)

RONGCHII (APRIL) 22, 2021

₹ 5.00

Dimapur nung COVID wara tanabuba atema renemshir

Dimapur, April 21 (TYO): Dimapur nung COVID-19 wara tanabuba anema rara nung civil society tem, NGOs, arogotem aser DTF-i yariteptsü mepishir, ta Dimapur Deputy Commissioner Rajesh Soundararajan-i ashi.

Bodbarñü Dimapur District Task Force senden nung jembidang Dimapur DC-i "tenokdangba kechi agütsüdir agüjaka ibaji timtem ajurutsü saka public ajungtsü atema agütsür, anungji ajaki timtem aremstü mepishir" ta ashi.

Iba senden nung Commissioner Police Dimapur Rothihu Tetseo-ia nisung ajak dang tebilemstü khuret bena tenokdangbatem takok ngua inyaka aotsü ayongzüik.

Chumukedima nung Covid Care Center lapokogo aser contact tracing team-i Dimapur kübok tesem balala nung random testing agia arudar, ta Dimapur CMO, Dr. Merenila-ia ashi.

Tangalen nungi arur aikati ketdangsur nem osang magütsür anungji sorkari tuyuba ama parnoki CMO office mesüra DTF nem osang sangoktsütsü atema DTF züngsemtemi inyakyim akangkanga inyaksüla, ta

COVID-19 virus mopung nung talangka alir: AIIMS Director

New Delhi, April 21 (Agencies): COVID-19 virus ya mopung nung mapang talangka alir, ta Bodbarñü AIIMS-Delhi Director, Dr Randeep Guleria-i ashi.

"COVID-19 virus ya kanga kara menatepa aoer aser nisungtem dak kanga mejungi kongshir. Anungji nisungtemi takdang nung mopung shitak lidaktsütsü merangang" ta Dr Randeep-isa ashi.

COVID-19 virus ya mopung nung mapang talangka alir anungji shibanga aliba takdang (closed room) nung mopung shitak lidaktsütsüla" ta paisa shisem.

Kokra nisung lokti adenshidaki maotsüla aser COVID inyakyim benshitsüla aser vaccine agi nunga mask enoktsüla. Iba ajanga virus

OFFICE OF THE
AO SENDEN
H.O: MOKOKCHUNG : NAGALAND
Ph: 0369-2228896/ e-mail: aosenden@gmail.com
Date: 21/04/2021

SANGDONGER

1. Tang asen lima nung COVID-19 tashitak wara tali züina aoba ajanga 21 Buba Ao Senden Yimkong Mungdang April 27, 2021 anogo ayongzüka aliba sentong mapang tatsüka atema thitema atar.
2. Asen lima nung COVID-19 tensa süngjema maküm tashi Ao litsü nung bendanglen nungi nübu jaoka sobaliba amungtsümung aser lokti senden ayonga mamung tajungba asütsü ta tekümdangtsü ayongzüker.
3. COVID-19 contact tracing aoba mapang nung nübur ajaki bangdakpur den ochishia amaliteptsü metetdaksür. Kari danga tashi mangaba ajanga tashitak menashidaktsüra Ao Senden tai madoktsü ta tekümdangtsü metetdaksür.

SD/-
Chubawati Longchar
President.

SD/-
Imtipokiyim
Secretary

Dimapur CMO-isa metetdaksü.

"Yaküm ama masü saka tangbo yipden 100 nungi 50 tashi COVID agi shirangertem anepalutsü atema renema lir. Tanüingba yipden 50 ji non-Covid atema lir. Maneni, Oxygen cylinders aser mozü peria dang lir" ta Medical Superintendent, District Hospital Dimapur-ia metetdaksü.

"District Hospital Dimapur nung Covid agi shiranger nisung 14 anepaluba nungi kabo mozü kidang nungi anizükogo" ta paisa ashi.

Dimapur District nung April 20, 2021 tashi nung nisung 35731 nem vaccine dose 46787 agütsüogo. Session sites 52 nung sessions 598 agiogo, ta District Immunization officer, Dr. Rebecca-ia metetdaksü.

"Covid vaccination center nung mozü agirtem aika arur aser yashi nisung 2722 tashi dose agiogo. Tang Dimapur district atema dose 4790 lir aser iba jagi April 22 tashi dang session sites nung mozü agütsütsü. Dimapur nung mozü peria angutsü atema onoki state sorkar den osang agitepdar" ta Dr. Rebecca-isa ashi.

menatepba anendaktsütettsü, ta AIIMS Director-isa metetdaksü.

"COVID vaccine agiaka COVID-19 menar anungji vaccine agitsü kechi nüngdak ta nisungtemi asüngdang. Ajisüaka, nai vaccine agiba sülen virus menatsü akok saka virus jagi nü temang nung kanga mejungi mekongshitettsü" ta Dr Randeep Guleria-isa ashi.

"Nüngdak mali sernung mozü kidang aritepa aoba ajanga petsaprong ang tali adoktsü. COVID19 putetba ta ser dangbo mozü kidang maotsüla. Mozü kidangi ao nung dang taneptsü angutsü ya masü. COVID-19 agi shirangba yimya timbaka yimra agi atongba, terok akongba amala lir aser itemji anogo 5-7 tsüngda mozütem chia taneptsü angur" ta AIIMS Director-isa metetdaksü.

April 23 nungi Dimapur nung Night Curfew tenzüktsü Shishilembaba aser senzüsenbongba nung tenokdangbatem agütsür

Dimapur, April 21 (TYO): April 23, 2021 nungi Dimapur district nung tenokdangba kar alitsü ta Deputy Commissioner, Rajesh Soundararajan IAS-i tanü metetdaksüogo.

COVID-19 azüoktsü atema Dimapur nung night curfew alitsü, weekly market melapoktsü aser New Market o Hongkong market nung dokantem anogo melentepa lapoktsü, ta Deputy Commissioner-i tanü sangdong ka nung ashi.

April 23, 2021 nungi tenzüka aonung 8:00 ako nungi anepdang 5:00 ako tashi Night Curfew alitsü. Anungji dokan, shishilembadak aser restaurants ajak aonung 7:00 ako tashi nungbo shibangtsüla, ta paisa ashi.

Ajisüaka, Night Curfew mapang Medical emergency aser pharmacy tem dena essential services menokdang aser nisung pezü dak tema adenshitsü memelar, ta Rajesh Soundararajan-isa metetdaksü.

Night curfew mapang khu abenba truck/garitem mesüra goods carriers den item gari nung nisungtem menokdangtsü. Air, rail aser road ajanga lenmang talang

jajartem dak alaka gari senzütsü memelar, ta paisa ashi.

New Market aser Hongkong market nung aliba dokantem Odd Even system nung anogo melentepa lapoktsü. Item tesem nung foot path vendors 50% dang amentsü melatsü aser iba atema DMC Administrator-i mapa inyaksü, ta Dimapur DC-isa ashi.

Dimapur nung weekly markets ajak shibanga atatsü ajisüaka weekly markets nung amenertemi pei pei colony/ward/village nung ayoktsü atema bangdakpur dang nungi temelaba meshitsüla, ta paisa ashi.

Dimapur district kübok Village Council/Colonies/Wards nung Gaonburas/Chairman-i pei pei telongter nung tangalen nungi arurtem jangjatsüla aser District Task Force nem iba osang sangoktsütsü, ta Dimapur DC-isa metetdaksüogo.

COVID-19 Nagaland: Nisung 97 dak putet

Dimapur, April 21 (TYO): Nagaland nung Bodbarñü nisung 97 dak COVID-19 aliba putet aser parnok züngsema nisung ajak agi 12,747 kümogo, ta Health & Family Welfare Minister, S Pangnyu Phom-i metetdaksü.

"Tanü nisung 97 dak COVID-19 putetogo. Parnokji Dimapur nung nisung 49, Kohima nung 46 aser Mokokchung o Tuensang nung kaka (1) lir. Tanü puteter rongnung parnok 64 ji traced contacts lir, returnees/travelers 28 aser armed forces/security personnel 5 lir" ta Minister Pangnyu-i ashi.

Tang Nagaland nung COVID-19 agi shiranger nisung 347 lir. Maneni tanü Phek nung nisung 4 taneptsü angur. Nisung 12,747

rongnung 12,114 taneptsü nguogo, ta paisa ashi.

Tang anepalurtem rongnung nisung 314 dak tajitetsü kecha mali, 19 dak shirangba yimya terara lir aser 12 oxygen agia anepaludar.

Nagaland nung COVID-19 puteter nisung 94 asüba nungi parnok 10 bio tanga timtem ajanga asü, ta Nagaland Health & Family Welfare Department-i metetdaksü.

Nagaland nung COVID-19 nung taneptsü angur 95.03% lir, ta State Nodal Officer for Integrated Disease Surveillance Programme, Dr Nyanthung Kikon-ia ashi.

Nagaland nung COVID-19 alitsü akok ta temolung melema bilemba sample 1,41,806 tendangogo. RT-PCR ajanga

Dimapur District nung alirtem ajaki Covid-19 inyakyim benshitsü tetuyuba agütsü. Iba mapa ketdangtsüa reprangtsü atema Village Council/Colonies/Wards Gaonburas/Chairman temi enforcement committees aser police sen yaritepa inyaksü tashi agütsür, ta DC Rajesh Soundararajan-isa metetdaksü.

Containment zone tema nung lokti, shisaliok, sobaliba, yimtenren, tamangba yimsü dak sendakba sentongtem nung nisung 50% mesüra 200 tashi dang adenshitsü melar. Benjungbentsü amongdang nisung kanga molongsoi amongtsüla aser kima nung nisung 200 den tema adenshitsüsa kümra, District Task force (DTF) dang nungi jelia temelaba meshitsüla, ta paisa ashi.

Sorkari tuyuba ama mashii mapang screening tests asütsü, ta Dimapur DC-isa shisem.

Iba tetuyuba ya April 23, 2021 nungi tenzüktsü aser aibelenertem Disaster Management Act 2005 aser Indian Penal Code (IPC) kübok arila balala nung ajemdaker merenshitsü, ta DC Rajesh Soundararajan-i metetdaksü.

NE Chief Minister temi Civil Services Day salem metetdaksü

Shillong, April 21 (Agencies): Bodbarñü Northeast nungi Chief Minister temi Twitter ajanga civil servants den Civil Services Day tepela salem lemsatepogo.

India sorkari küm shia April 21 nü Civil Services Day amonger.

Iba anogo ya Civil Services ajaki amonger aser iba anogo nung civil servants-i tesüibatem meyipa reprangshir aser tarutsü atema sentongtem asameyanger.

"Civil Services Day nung Civil Servants ajak dang salem abener. Nenok ya linük atema tongtoret lir. Nenoki linük yangerba nung bendanga agütsüba aser public service inyakba atema tenütsang agütsür" ta Arunachal Pradesh Chief Minister Pema Khandu-i ashi.

linük tenzükba wadang nung bendanga agüja inyakba atema tenütsang agütsür" ta Assam Chief Minister Sarbananda Sonowal-ia metetdaksü.

"Civil Service Day nung civil servants aser parnok kibongtem dangi salem tulu abener. Nenoki bendanga agütsüba aser meranga inyakba ajanga India tejakleni aoer aser ni nenok nem tenütsang agütsür" ta Manipur Chief Minister N Biren Singh-ia ashi.

"Civil Service Officers-i sorkar ketdangsbaren nung tongti shilem agir. Civil Services Day nung ni Meghalaya aser linük nung alirtem ajak tenüng nung ketdangsurtem dangi salem abener" ta Meghalaya Chief Minister Conrad Sangma-ia metetdaksü.

"National Civil Service Day nung civil servants ajak dangi salem abener. Nenoki mapa tajung inyakba atema

pelar, talisa COVID-19 wara anemara nung aser sorkar policy tem nung shilem tulu agiogo. Nenok ajaki iba linük tajungba akümtsü atema maneni inyaksü moatsür" ta Nagaland Chief Minister Neiphiu Rio-ia ashi.

"Linük ketdangsbaren nung Civil Service system ya tongtoret lir. Sorkar indang policy temji civil servants ajanga dang mapa kuma inyaker aser nübertemi aginüba tongtsür. Sorkar ketdangsbaren nung nenok melira loktiliba tejakleni moutettsü" ta Sikkim Chief Minister Prem Singh Tamang-ia ashi.

"Civil Services Day nung Civil Servants aser parnok kibongtem den salem lemsateper. Civil servant ka indang teinyaktsüji nübertem atema inyakba dang masü saka yimya ajaki linük akhüm aser jenjang kümzüka ayur" ta Tripura Chief Minister Biplab Kumar Deb-ia metetdaksü.

Kohima DTF ajungben senden menogo



Deputy Commissioner Kohima, Gregory Thejawellie, NCS lenisüba kübok DTF senden amenba noksa nung angur. (DPRO Kohima)

Dimapur, Rongchii/April 21 (TYO): Kohima District Task Force (DTF) on COVID-19 pur ajungben senden ka DC indang Conference Hall, Kohima nung April 20, 2021 nü Deputy Commissioner Kohima, Gregory Thejawellie, NCS lenisüba kübok mena liasü.

Iba senden nung DTF züngsemtem den külemi Kohima Village Council, Angami Youth Organisation aser Angami Student Organization nungi alakteta jaokertem dena liasü.

Iba senden nung district nung COVID-19 positive cases jenjang, mozü agütsüba maparen aser tashidak nungi jenbua alitsü renema alitsüba onüktem nung ajemdaker jembishinüa liasü.

Iba senden nung Intensive Care Unit (ICU) ka Naga Hospital Authority Kohima (NHAK) ajanga Meriema Covid Care Centre nung amenoktsü lemtet. Iba dak sendakba nung power aser tziü atema department dang tekeratiba nung anepalutsütsü nungloksütsü lemtet.

District nung COVID-19 tashidak prokshia aoba nokdangtsü atema ADC Kohima, Bhavani Sri amteper medical team, police, All Kohima Municipal Wards & Panchayats (AKMWP) aser sector magistrate temi jila aser ward ajak nung face mask agidaktsütsü aser danga COVID yimyatem amshidaktsütsü sentong tenzüksü lemteta liasü.

Iba senden nung KVC, AYO, ASU tirttem aser züngsemtemi pei tebilemba lemsatepa liasü.

Tabi agi COVID-19 sample bendena tendangba, COVID care center nung nübu ajema aliba, COVID-19 agi shirangertem belenshitsü atema Ambulance agi anünga aliba, bill mangu aliba, entry point tem mitba amala onüktem iba senden nung benoka jembi aser item tebilemstü ya tekeratiba nung sorkar den tongteprateptsü lemteta liasü.

Deputy Commissioner ajanga par administrative officer ajak dang Covid Task Force tenzüka COVID-19 tashidak prokshia aoba nungi nokdangtsü asoshi pei sub-division nung mera balala agitsü shia liasü.

Kiphire nung Padhna Likhna Abhiyan agiogo

Kiphire, Rongchii/April 21, 2021 (TYO): Deputy Commissioner, Kiphire indang Conference hall nung Bodhbarnü (21.04.2020) 'Padhna Likhna Abhiyan' lapokba sentong agiogo, ta sangdong ajanga metetdaksü.

Iba sentong nung Director, School Education, Wonthungo Tsopoe-i okila jembiba mapang, lokti nung tajungleni temelenshi adokdaksü aser iba mapatong (Padhna Likhna Abhiyan) takok ngua achaayangtsüsa Department-i tesayurtem iba sentong nung jaoker, ta ashi.

Tanurtem kaket shisatsü bushiba tsütsü tim tesayuba agüja anitetsü asoshi Arogo, Yimtsüng nung council aser Village Education Committees (VEC) temi tesayurtem nungittsüla, ta pai telok ajungshia liasü.

Tanur/kaketshir tem nem kaket shisatsü bushiba jenjang tajungba agütsütsü asoshi tesayurtemi kanga dang nendaka aser bendanga agütsür inyaksüla. Iba den külemi kaket nung zülua aliba kisüng sayuba dang mesüi tanurtemi jangrabangra angazüksü asoshi lenla aisü nung rajema aliba tesayur ka ka akümtsü merangtsüla, ta pai sentong nung adener tesayurtem dang mepishi.

Headmaster peria/abensa maliba ajanga Government High School aika nung timtem ajurur aser itemji asadanga Department-i takaraba nung achaayanga Headmaster agütsütsü meranga inyakdar, ta pai shisem.

Kasa sentong nung SDO (C), Kiphire, James Khulu Tikhir-ia jembia liasü.

2030 küm tashi linük nung tanur ajak zünga shia metetba tsütsü ajangzüktsü nükjidong yur Padhna Likhna Abhiyan sentong tenzüksür, ta James-i ashi.

Iba mapatong takok angutsü asoshi ajak longjemer inyak nungang ajangzüktsü aser lokti nung temelenshi tulu adokdaksütsü asoshi tesayurtemi shilem tongtibang agitetsü akok, ta paisa ashi.

Maneni iba sentong nung DEO Office nungi LDA Bovika A mendenbuba liasü. AEO, Wobenthung Lotha-i telok pela agizük aser Supervisor, SE, A. Rankhaba-i tepela anküp o jembi.

Padhna Likhna Abhiyan lapokba sentong nung Kiphire kübok block asem - Pungro, Longmatra aser Khongsa dena liasü.



Deputy Commissioner, Dimapur indang Conference Hall nung April 21, 2021 nü Dimapur District Task Force pur senden alidang Deputy Commissioner, Dimapur, Rajesh Soundararajan IAS ajanga o jembiba mapang tangokba noksa ka yangi angur.

Dimapur nung nisung tasü mang ka nguteta lir

Dimapur, Rongchii/April 21 (TYO): Dimapur-Khatkhathi End tsütsü KM No.261/8-9 nung aliba train lenmang nungi April 21, 2021 nü mejangjaba nisung (Naga nungner masü tebur arishi küm 25-30 shi) ka tasü mang nguteta lir, ta sangdong ka ajanga ashi.

Ozüng agi melaba ama maparen ajak tembangba sülen tasü mang ya PM examination

aser jangiatetsü asoshi District Hospital Dimapur-i belener oa lir.

Iba nisungba ya anüng sentsü jacket ka, belt temoro ka, long pant temoro, moja aot sentsü aser slipper tanak ka agir liasü.

Asür indang kinunger aser tembartemi Govt. Railway Police Station (GRPS), Officer-in-Charge den tongteprateptsü akok, ta sangdong ajanga ashi.

Longleng nung ki ka shibangtsür

Dimapur, Rongchii/April 21 (TYO): Agri ward, Longleng nung aliba House No. 100 nung alir dak COVID-19 putetba sülen iba tashidak prokshia aoba azüoktsü aser nungdakba tsüngsü pua aotsü atema iba ki ya shibangtsür (sealed) ta Deputy Commissioner,

Longleng ajanga sangdong ka nung metetdaksü.

Shibangia aliba tesem nung nisung/gari senzüsempingba ajunga nokdang aser iba tesem ya tang nungi tenzüka tarutsü nung osang ka magütsü tashi kanga junga mita alitsü, ta sangdong ajangasa ashi.

Tuensang nung ULFA (I) züngsem ana temai adok

Dimapur, Rongchii/April 21 (TYO): HQ IGAR (North) kübok Assam Rifles, Tuensang Battalion ajanga telung nung alirtem temai adoktsü atema meranga inyakba nung süngiang tanga Tuensang district kübok ULFA (I) züngsem ana temai adoka bendanga agütsüogo, ta sangdong ka ajanga ashi.

Züngsem ana temai adokba ajanga region nung tanünga züngsemtem temai adoktsü

ajungmesotsü imlar, ta sangdong ajanga ashi.

Parnok telung nung aliba mapang kanga timtema ali, ta ULFA (I) züngsem ana yagi ashi aser külem züngsemtem dang azüdokshi yutsütsü ayongzüka liasü.

Telung nung alir ana temai adoka bendanga agütsüba ajanga Assam Rifles temi region nung yimjung asoshi inyakba kuli sayuteter.

Kaket reju anasa moko ayokba merenshitsü: DC Kohima

Dimapur, Rongchii/April 21 (TYO): Kohima Municipal Council (KMC) kübok aliba kaket reju anasa aliba dokan nung moko agi yangluba oset ayokba asemen putetra item dokan indang trade license meshia ayutsü, ta Deputy Commissioner & Chairman DTCC, Kohima, Gregory Thejawellie, NCS ajanga sangdong ka nung metetdaksü.

Dokan kiburi iba totuyuba ya züngzünga angaoka amshitsüla aser aibelener nem temerenshi agütsütsü, ta sangdong ajanga ashi.

Deputy Commissioner & Chairman DTCC, Kohima, Gregory Thejawellie, NCS ajangasa sangdong ka nung, Cigarettes and Other Tobacco Products (Prohibition of advertisement and regulation of the trade and commerce, production, supply and distribution) Act 2003 ya Kohima District nung tang nungi tenzüka amshitsü, ta metetdaksü.

Iba özüng kübok nüburtemi amshiba tesem nung moko achiba, moko (cigarette) aser danga moko osettem, arishi küm 18 tekübok alir dang moko ayokba, kaket reju temeket tasazük yard 100 nung moko oset ayokba, moko aser iba amala osettem ayokba aser yangluba nokdang, ta sangdong ajanga ashi.

DC-isa ketdangsurtem dang lokti senden aser sentong mapang nüburtemi amshiba tesem nung moko achiba nokdanga signage board tem inoktsü totuyuba agütsüogo aser iba totuyuba dak sendakba nung mera agiba osangtem Deputy Commissioner indang office nem osang agütsütsü metetdaksü.

ayokba merenshitsü: DC Kohima

Dimapur, Rongchii/April 21 (TYO): Kohima Municipal Council (KMC) kübok aliba kaket reju anasa aliba dokan nung moko agi yangluba oset ayokba asemen putetra item dokan indang trade license meshia ayutsü, ta Deputy Commissioner & Chairman DTCC, Kohima, Gregory Thejawellie, NCS ajanga sangdong ka nung metetdaksü.

Dokan kiburi iba totuyuba ya züngzünga angaoka amshitsüla aser aibelener nem temerenshi agütsütsü, ta sangdong ajanga ashi.

Deputy Commissioner & Chairman DTCC, Kohima, Gregory Thejawellie, NCS ajangasa sangdong ka nung, Cigarettes and Other Tobacco Products (Prohibition of advertisement and regulation of the trade and commerce, production, supply and distribution) Act 2003 ya Kohima District nung tang nungi tenzüka amshitsü, ta metetdaksü.

Iba özüng kübok nüburtemi amshiba tesem nung moko achiba, moko (cigarette) aser danga moko osettem, arishi küm 18 tekübok alir dang moko ayokba, kaket reju temeket tasazük yard 100 nung moko oset ayokba, moko aser iba amala osettem ayokba aser yangluba nokdang, ta sangdong ajanga ashi.

DC-isa ketdangsurtem dang lokti senden aser sentong mapang nüburtemi amshiba tesem nung moko achiba nokdanga signage board tem inoktsü totuyuba agütsüogo aser iba totuyuba dak sendakba nung mera agiba osangtem Deputy Commissioner indang office nem osang agütsütsü metetdaksü.

Kaket reju anasa moko



Assam Police-i tepuokdak nungi jena aor ka Meghalaya kubok Ladrymbai nung apuba sülen agiba noksa angur. I ba nisung ya Gofur lir aser pa ya ozüing alema inyaker ka aser nisung tepsetba ken o nung tai tonglokja lir. Pa dak coronavirus aliba putetba agi Mahendra Mohan Choudhury Hospital-i anir aodang pai police ket nungi jena aoba liasü ta Assam Director-General of police Bhaskar Jyoti Mahanta-i metetdaksüogo

Assam sorkari Covid-19 atema tetuyuba tasen agütsüsemmer

Guwahati, April 21 (Agencies): Assam nung Covid-19 kanga menatepa atema Bodbarnü sorkari tetuyuba tasen kar agütsüsemogo.

"Mongulbarnü sorkari standard operating procedures (SOPs) sangdongba dak alia tanü ano kar agütsüsemmer" ta Assam chief secretary Jishnu Barua-i ashi.

Tanü tetuyuba agütsüba nung aonung 6:00 ako tashi dang restaurants, dhabas aser chiyungtsü lapoktsü shia lir.

Ajisüaka, e-Commerce ajanga essential goods agütsüba maparen aonung 6:00 ako sülena inyaktsü akok.

Guwahati nung COVID-19 agi shiranger nisung 1000 tongra hotel aser shisaliok reju ajak shibangtsü ta Assam Health Minister Himanta Biswa Sarma-i metetdaksü.

Kamrup-Metro district administration-i iba telemtetba

agütsü tashi agütsür ta Himanta-i ashi.

"Guwahati Metro nung nisung 1000 tongra district administration-i hotel aser shisaliok reju ajak shibangtsü. School, college aser University ajak shibangtsü" ta pai metetdaksü.

May 2, 2021 nü COVID-19 indang tensa asadangba sülen taruba ita HSLC, HSSLC aser tanga tatidangtem agütsü aliba atema telemtetba ka agütsü, ta Minister Himanta-isa ashi.

"School, college aser university tem shibangra kodaser tatidang agitetsü. Athitsüsa akümtsü saka May 2 sülen ang telemtetba ka agütsü" ta paisa shisem.

Tangalen nungi Assam-i arur ajak anogo 7 nü home quarantine asütsü. Assam sorkari COVID-19 tendangdak tajungba kümogo, ta Himanta-isa metetdaksü.

Guwahati nung hotel temi nija

mozü ki den yariteper:

Guwahati nung COVID-19 wara anema rara nung hotel temi nija mozü kitem den yariteper.

Guwahati nung aliba hotel tem nung COVID-19 shirangertem anepalutsü atema takdang agütsür.

Bodbarnü Deputy Commissioner, Kamrup-Metro indang office nung senden ka amendang Guwahati nung nija mozü kitem aser hotel ketdangsur kar tsungda iba tenangzüktep agia liasü.

Parnoki Assam Chief Secretary Jishnu Baruah den senden amendang telemtetbaji agi.

Nija mozü kidang yipden süngadokra anasatiba hotel ka nung shirangertem anir oa anepalutsü ta tanü parnoki lemtet.

Mongulbarnü Assam nung nisung 1651 dak Covid-19 aliba puteta liasü. Parnok züngsema nisung ajak agi 2,27,473 kümogo.

Tripura nung nisung o nisung tsungda tepila mayur dang Rs 1000 senchi achitsü

Agartala, April 21 (Agencies): Tripura nung gari nung senzürtem aser dokan nung shishirtemi nisung o nisung tsungda tepila meyura aser home quarantine alema inyakra Rs. 1000 senchi achitsü ta state sorkari metetdaksü.

Ano nisungtemi mask meinokra mezüing atema Rs 200 aser tanaben atema Rs 400 senchi achitsü ta sorkarisa ashi.

curfew ozüing agütsüogo.

Senchi achitsüba den külemi sorkarisa Agartala Municipal Corporation telongtet nung aonung 10:00 ako nungi anepdang 5:00 ako tashi night


Iba tenokdangba nung medical & other emergency needs, health, police, security, power supply, drinking water supply amala essential services nung inyakertem madener, ta sorkarisa ashi.



Agartala, Rongchii/April 21: Mongulbarnü Agartala nung TTAADC (Tripura Tribal Areas Autonomous District Council) indang executive committee züngsem tasentem tenangzüktep agiba sülen telok noksa ka tangokba yangi angur.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma, aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **H. Umar Chesam contact no.7627998690 / 9362359056**

Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM -Yours sincerely - Atola, Add: 5 Mile**



Meghalaya tesayurtemi NEHU nung CBI nem bushisüngdang asütsü akhanger

Shillong, April 21

(Agencies): Meghalaya nung tesayur telok aseme North-Eastern Hill University (NEHU) nung CBI nem bushisüngdang südaksütsü atema takhangba agütsüogo.

NEHU nung hostel aser residential tesemtem nung mapa inyakba nung metokmeperi liasü aser ketdangsurtemi NEHU Building Committee indang bangzüngtem anema inyakogo ta shia CBI-i bushisüngdang asütsü temelaba meshiogo.

Iba atema Meghalaya Tribal Teachers' Association (MeTTA), North-Eastern Hill University Teachers' Association (NEHUTA) aser Meghalaya Confederation For Academic Welfare (MeCAW) teloktemi tebilemtsü khuret abenba metetdaksü.

"CBI nem bushisüngdang asütsü temelaba agütsütsüla.

Iba ken o atema ochi obendang angutsü atema parnok nem mapa inyakdaksütsüla" ta MeCAW, MeTTA aser NEHUTA-i ashi.

Committee nung secretary ji NEHU Registrar lir saka Engineer nem work order magütsü dang pai osang ajak melemsatop. Iba inyakim ya jungjunga bushisüngdangtsüla. NEHU-i temelaba magütsüra, parnoki ochimashi ketdangsurtem miimbanga ayur aser parnok den yariteper ta asütsüsa akümtsü, ta telok asemisa metetdaksüogo.

"Vice-Chancellor mali lir saka shibai work order agütsü'ar ibaji metettsü tim. VC mapa inyaka alisang Pro-VC tang Chief Vigilance Officer (CVO) kümogo aser pai iba work order agütsü süra ken o tulu ka akümer" ta tesayur telok asemisa metetdaksüogo.

Mizoram nung Rs 2,14,52,280 alang kozüjang apu



Aizawl, April 21 (Agencies): Mizoram kubok Champhai district nung 23 Sector Assam Rifles indang Serchhip Battalion-i kozüjang bosta 954 apu.

Mongulbarnü Assam Rifles sepaitem aser Custom Preventive Force ketdangsurtemi Khawbung nung mita aodang kozüjang bena aliba apu.

Kozüjangji truck gari ana nung bena liasü aser iba indang jenjangji Rs 2,14,52,280 shi asütsü ta asadangtetogo.

Kozüjangji Champhai nung Indo-Myanmar international border adena bener aotsüba liasü.

Tawa tu Assam Rifles-isa Vaphai nunga kozüjang bosta 395 apu. Iba indang jenjangji Rs 74,000 shi liasü.

ULFA-I-i ONGC nung mapa inyaker 3 apu

Sivasagar, April 21

(Agencies): Bodbarnep United Liberation Front of Assam-Independent (ULFA-I)-i ONGC nung mapa inyaker nisung asem puogo.

Assam kubok Sivasagar district nung tanep 3:00 ako meta Lakuwa nungi par asem pur ao.

ONGC nung mapa inyakertemji Mohini Mohan Gogoi (Junior Engineering Assistant), Rital Saikia (Junior Engineering Assistant), aser Alokesh Saikia (Junior Engineering) nungertem ta

jangjaogo. ONGC indang gari ka nung parnok anir ao aser iba gariji Assam-Nagaland arrtsü anasa Nimonagarh arem nung lia nguogo.

"ONGC-i iba tatalokba atema police tsüngdang FIR ka benokogo aser tongti ketdangsurtem tesem tonga ogo" ta ONGC-i metetdaksü.

Yaküm December ita nunga ULFA-I-i Arunachal Pradesh nung QUIPPO nung mapa inyaker ana pur ao aser ita asem tema ayuba sülen chioka liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 22, 2021

Teka mapa inyak angazükba mapang

Yaküm küm dang nungibo tamajungba asütsüsa, ano, Covid-19 tashidak wara asen lima tonga arudagi. Tashidak wara ya tenük agi ngua arur asübo asenoki repranga lir melamelaa atsükadokla mesüra tashidak wara mesen malilen oagi jenokla, ajsüaka tenük agi mangur asünungji, tashidak waraji asen anasa lir ta bilema kanga kümdanga alitsüba dak alaka tashidak mali ama bilema zübazülema malitsüla. Joko, asen lima nunga tashidak wara prokshia maotsü atema Dimapur nungbo asung aonung nungibo curfew tenzüksü. Atangji, Corona tashidak mesen ya aonung dang senzüba agi aonung curfew agütsür ta masü saka yimya agi nisungtemi anüngdangbo akok tashi kanga kümdanga senzür saka aonungbo tashidaka mali ama aikati mekümdangi senzür, idangji tashidak tali prokshidaktsür, anungji iba ama mekümdangi mesenzüdaktsütsü atema aonung nübortem azüoktsü sentong yanglur. Aji oda, anüngdanga kanga nungdak mapa ka mesüra kimalen aser talisa shishilemdaki maotsüla. Joko, alima tensa agi ibai pei kija mapa inyaka taküm alitsüba mapang ka agi asenok menepadokogo. Iba tangatetba nung kodang asenoki Covid-19 tashidak wara nungi jenbua alitsü asoshi tangar bushia moi asen kija alitsü tenzükdir, inyaknü meinyaknü ta masü saka pei kidang, pei lu nung mesüra pei li nung aseni akokba aser jangraba mapa ka mesüra kabo tenzüka inyaktsüsa akümtsü. Corona tashidak wara ya menatepa aoba tashidak asünungji tangar alidaki maotsü aser tangar den menatepa mesüra kongshitepa mesenzütsü merangtsüba dang ashi, corona tashidak wara mesama tashi kecha meinyaki tangari teyari terara agütsüba chiajema kidang dang amongtsü ta masü saka asen kinungertem kija mapa inyaka amongba sobaliba tajung ka tenzüksüla. Jungjunga bilemdangra, mapa inyaknertem atemabo ibai mapang tajung ka lir, kechiyong mapang endoka kimalen senzütsü memelar, anungji asena kechalenia maor aser asen dangia shinga marur. Aji oda, anema dang lira, shisabolu mapang agi temoatsü kuma inyaktsütsüba mapangji tang ya lir. Kin mesüra nisung ka tajung akümbaji teti pelatepa aliba agi masü saka tetsübu aser shisabolu tensa mapang tamajung agi amokmerenba ajanga, iba ama tensa mapang tamajungji akoktsü merangdang mapa tasen tenzükter aser akhidang dang nungi temerangba inyaker aser Tsüngrema tetsüsuba tsübur. Aji oda, kidang kazüa melii mesüra anü adoka mejanga melii shisa tasen bendenloka mapa meranga inyak nung, iba kin, iba kibong aser iba nisungji kodaser memoatsütsü aser kodaser tajung makümtsü? Tanü putu nung asenoki dang yanglutetra, süng, long aser aou süngküm aser tu dena teindoktsüla mali, ajak jagi sen kümtettsü. Atangji, talisa lanurtem asoshi teka mapa inyaktsü atema kari sayutsüla, kechiyong tanü asung kaketreju nung, meshitak kaji, teka mapa kecha mesayur. Aji oda, tang ama tangleni ao majung kidang amongba mapang ya tain kari lanurtem dang teka mapa kar sayutetra lanurtem asoshi shitakba shisaliok angazükdakbo aji dang asütsü. Tanga mapa aika mesayuyonga molokmotok atak sayura, nisung kar dang yong alia molokmotokji aika taktettsü aser itemji kari ayoktsü ta Covid wara ya tesüngjembra kümer külena item mapaji industry kuma inyaka aotsü. Atangji, nisung aikati shiruru metsüba, aonsutsü aser süngjanglijang lu ayimba aser karibo asen lima nungi adokba aonsutsü aser süngjanglijang agi chiyongtsü tapu balala yangluba mapa tenzüktertsü. Ano, lanurtem karibo jangotsü nungi tenzükter nisungtem nungdak ajak ki tonga oa agütsütettsüsa dokan-a lapoktettsü. Tanü putu nung yabo tanurtem kaketrejui aoer masü saka tesayurtem online ajanga ki tonga arur. Kasaji, asenok nungdak alitsü atema dokani tsüngdong aoer masü saka asen nungdak bentsür dokan kibur asen ki tonga arur. Ano, lanur karibo ki tonga orr tadongtsü ka tongtsüba taxi service-a tenzüksü akok. Iba amaji putu tensa dak apet mapa tasen tenzüka inyaktsü asoshi lanur shiai bilemdangtsüla. Asenok asoshiibo Covid-19 tashidak wara aruba ya kechalenia mao aser kecha meinyak takoksa anguba mapang ka masü, saka asenok kolok agi mapa tasen apiteta asen teka agi mapa inyak tenzükba mapang tajung ka südaktsüdi.

OLEMSABANG

Tanü putu den apet kulisüba

~ Mr. Imkümeren (Otongdar)

Iba mabensa lima nung Tsüngremer temeim hadir (instruments) asütsü asoshi meimchir ajabaji kulisüba lir.- Schwiutzer

Okila

Kodang kuli südir iba nisungbaji tejangja asset shitak ta liteta sayuba taküm asütsüla saka tanü putu nung iba tejangja aser shitak kanga mesüa akümba angur. Tanü putu nung tamangertem aoshi kulisüba kanga tongtipang kümogo. Kechiyong kulisüba melira Tsüngrem osang tajung sangoktsüba mali. Iba ocet ajanga Putu yimya kar repranga koda kuli asütsü tangazükba agidi.

Digital aser Internet Putu:

Digital aser internet ya melira tanü putu ya kangasa mabensa ka amai bilema amshitepa arudagi aser iba ajanga tajangzük temoatsü jenti agir kechiyong iba ajanga-

- * Ajaki shilem agiteter.
- * Ajak asoshi sadoka lapoka inyaktsütsüsa, Kati ka den longjema liteter.
- * Sensaksem kateter.
- * Lokti telok balala tenteta ayutsü akok.
- * Mela-mela shisatsü metetnubattem angur.

Tanü lanu tain timba agi sapua amshiba social media-temji Facebook, Instagram, Twitter, YouTube, Podcast aser yamalatem media balala amshiteper. Saka tebilemstükaji digital aser internet amshiba ya aika asoshi addiction kumadokba angur. Ni ajangshiba ka yamai lemsateper, asangur ka pa mapa meinyaki pa mapang ajak internet nung games asayaba aser Facebook, Instagram, YouTube noksa tamajung repranga (Pornography) aser WhatsApp-ji liasü. Pai ashibaji tama pa yipden nungi saaka maludang phone repranger, social media balala balala nung notification repranger aser yamaji, pa asoshi phone nung battery aser balance temadokra jashir aser jakla adoker. Pa asoshi network melii kazübaji tasaktiba. Anungji pa asoshi item nung mapang indokdang, tsürabur, medemer, lokti, sentep aser yamaji telongjem balala nung shilem agitsü mejangrar aser aiben kisung dang kazür. Timi chiyunga, jema mesüi nükena kazür. Anungji pa asoshi amjang sangwa kecha meli-i pai ashibaji, ni item amshiba ajanga ni jangratemdaktsür aser ni-ji shibar iba internet nungang tali jangjadaktsür. Tanü asoshi tebilemstüji internet-ji masü saka pei-i mazüokteti amshiba ajanga kibong, lokti aser kija tia jenjang raksaba jenti lir. Tanü iba Digital aser internet putu nung tamangertemi koma kuli asütsü?

Lipo-Küm timtimba Putu (Ecological Crisis):

Tanü alima nung lipo-küm asoshi tebilemstü ulura ka kümogo. Tzüngsang-mopungtem küm ishika jakdang nungi tanü temelenshi jenti lir. Tajungbalen temelenshi masü saka tamajungba kuma odagi. Ya shiba Tai? Shiba ajanga? kolen nungi? Asenok ajak asoshi telangzüba ka dang lir, meimchir ajanga lir. Tanü asen lima nung lipo-küm timtem aika lir saka kar yamai lir:

- * Lim-tem mapayu-i ajak asen amshinütsüsa amshiba. Tanü lim-tem wazüka mayubayong, ayongtem, tzübo nung tzü kongadokogo aser alitem-a temo mali kumadokogo.
- * Tzüngsang yimya kanga temelenshi jenti lir.
- * Ozü, shiruru aser angutem timbaka wazüka meyeteti tepseta, mozü kümdaktsür achiba.
- * Nütsung yongsük Town nung timba akümba aser aremtem ajak chidoka nisung alitsü ki asüba. Yimtsung toktsür Town-i timba arua litepba.
- * Janatem tim-i indoktsü yimya maliba. Janatem, nullah aser ayongtem nung indokbayong taküm shiruru aser aluyimertem timtem jenti aliba angur.
- * Garitem jenti kümer iba nungi mokozü adokba agi mopung menena, timtem jenti bener aruba.

Tanü alima ainba nung ajemdaker asen tetsüh-tebou-i wazüka toktsüba lima atema jenti aseni mashileni lipo-küm asoshi teraksa jenti bener aruogo. Tanü iba tensa nung tamangertem asoshi iba lima lipo-küm asoshi koma kuli asütsü.

Naga kin tebilemstü putu

British nunger yimsütsüba yimya kaji kudasür tebandang adokdaktsütsü aser tebandangba iba lima nungi kechi rongsentem itemji bener aotsü ta asüba tebilemstüba nükjidong liasü. Kodang India nüchiso angu, India ajanga longjemtsüba shisatsü masü saka iba Colonial shisatsütem bener tanü yimsü asüba angur. Naga nunger asoshi nüchiso angutsü yongya tulu lir saka reprangdangra tanem-tanemi, item nükjidong samar amai bilemer, kin-o kin na asoshi tajangzük bushiba timba kümer, telongjem meli-i asen Naga nunger teraksa agi sünga arudagi. Tanü Naga nunger pei sasa inyaka litetba kin masü saka, Indian Government kisung nung metaloka aliba angur. Asenoki Naga nunger kintem rongnung telongjem, temeim meli-i pei tajangzük kisung nung liyonga odar, shiba-i metet tarutsü asoshi tebilemstüji, aser kin ya oda "Naga kin ta asüba kin ka liogo ta asüba" tia jenjang arutsü menu-a mali. Tanü iba tensa nung tamanger-i kechi koma Tsüngrem osang tajung kuli süla?

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemaba ken-o ama tazüngerü angateta agitsü mepishir

Ethiopia nung Orthodox Khristan em anema inyakba nok dangtsü akhangger



Washington, April 20, 2021: Mongolbarnü Washington nung U.S. State Department kima lokti adenshia Ethiopia nung Orthodox Khristan em anema inyakba nok dangtsü atema takhangba agüja longkak aitba noksa nung angur.

Washington D.C, April 21 (Agencies): Tang Ethiopia linük nung Amhara nung aser Orthodox Khristan em anema inyakba ajanga nisung meyrjang aika jenshiba mapang nung Mongolbarnü Washington D.C nung U.S. State Department kima lokti tuluka adenshia Ethiopia nung Khristan em anema inyakba nok dangtsü atema sorkar nem takhangba agüja longkak aitogo.

Washington, D.C. area nung amenoka aliba 'Voice for the Voiceless Ethiopians' teloki Joe Biden-i aniba administration dang Ethiopia nung lisopur aser Khristan em anema inyakba atema Ethiopia sorkar anema inyaksüla, ta takhangba agütsü.

Parnokisa Ethiopia nung ruling OPDO-Prosperity Party-i meimchir temeden balala anema inyakba anema nokdakertem- Balderas for True Democracy nungi lenirtem- Eskinder Nega, Sentayehu Chekol, Aster (Qeleb) Seyoum aser Askale Demele nung nem bail agüja tepuokdak nungi chioktsüla, ta takhangba agütsü.

Linük nung yimti tulutiba aser yimtiba, Addis Ababa nung nüburtem bendangshidanga züngshiba anentsü atema Balderas for True Democracy in Ethiopia-i takhangba agütsü; iba telok ya linük nung register süa aliba yimtenren party ka lir.

Interview ka nung jembidang Voice for the Voiceless Ethiopians telok nung public relations officer, Yohannes Gethaun-i parnoki Washington D.C nung longkak aittsü atema ayongzükba nükjidong metetdakja liasü.

Yohannes-i, "Mapang tatsüka asoshi Ethiopia nungertemji yimtentem lenirtemi masü saka technocrats-i yimsüsüsüla ta onoki akhangger. Tesüiba küm 47 tashi parnoki yimsüsüba tsütsü tamakok kanga nguogo, anungji onoki mapang ka lateta yur technocrats nem yimsü sädaktsüner," ta metetdaktsü.

Yohannes Gethaun-isa, 2018 küm nungi tenzüka Oromo

Peoples Democratic Organization nungi linük nung Tenla kitem den ki jenti raksatsüyonga Ato kilonser, Abiy Ahmed Ali-i kecha meinyakteter; pai iba atemaji kecha bilenja mali, ta ashi.

Longkak aitba sentong nung shilem agir kati, "Pai (Ato kilonser) ano taruba küm 10 nungi 20 tashi yimsüsüsü tebilemba lir. Election nung ochimashi lir. Tanga linük nung nisung ka kijai tashi amshia yimsüsür," ta ashi.

1991 küm nungi Tigray People's Liberation Front-i yimsüsüba mapang nungi tenzüka tang tashi linük nung chichiba democracy mali, ta pai ashi.

Osangbener den jembidang longkak aiter rongnung ka, Waussihan-i, Ethiopia nung tensa mejungi aliba aser Ato kilonser Abiy Ahmed-i Amhara nung anema rara ayongzükba osang alima dang sangdongtsü atema pai longkak aitba sentong nung shilem agir, ta ashi.

Waussihan-isa, "Abiy Ahmed-i par sepaitem ayongdena aluyimer chirnürtem aser tetsütem tepseter. Sepaitemi tetsütem tepok rangpoker, kechiyong parnoki Amhara nung kinü chanu asor. Alima nung osangbenertemiba osang magizüktetba atema ni mepelar," ta ashi.

"Abiy Ahmed-i Tigray nung anema rara ayongzükba aser tanurtem tashiyim amshia raksatsüsü atema temelaba agütsür. Pai nüburtem tepseter, kechiyong parnokji lisopur Amhara nung lir," ta paisa ashi.

"Tang Ethiopia nung tatalokbatem ya onoki alima nem metetdaktsüner. Onoki ibaji dang nungdaker. Onoki teyari kecha menügdaker saka alima nung aliba linüktem nem tang Ethiopia nung tatalokbatem dang metetdaktsüner," ta paisa shisem.

Mongolbarnü longkak aittsü jelia Voice for the Voiceless Ethiopians nung Task Force Chairman, Shimelis Legesse-i sangdong ka ajanga, "Abiy

Ahmed Ali menden nungi agentsü atema mapang tongogo. Ethiopia nung nütsüng million 116 ji pei atema dang bilemer ka ket nung meyutsüsüla. Sorkar melentsü atema yimtenren nung ajemoka malir Ethiopia nung technocrats nem maangka agütsüsüla," ta metetdakja liasü.

"Anungji onoki US sorkar dang Ethiopia nung taginüba ataloktsü, ozüing akhümtsübuttsü aser democracy alitsü atema yimtenren jenjang nung inyaksü onoki mepishir," ta kasa sangdong nung shia lir.

Ethiopia nung tensa mejungaka US aser alima linüktemi ola madokba atema mepelai Gethaun-i, taoba mapang Trump administration-ibo Ethiopia nung tang aliba sorkar nem military aser security teyari agütsüba anena liasü, ta ashi. Paisa, Biden administration-i maneni Ethiopia nem iba teyari magütsüba atema pelar, ta ashi.

Tamalen-a Legesse-i shidi ka ajanga Secretary of State, Antony Blinken dang Ethiopia nung meimchir temeden anema inyakba jenti liaka USA administration-i temelung magütsür, ta metetdakja liasü.

March 15 nü züluba shidi nung Legesse-i yamai shia lir, "Tigray Peoples Liberation Front (TPLF) yimsüsüba 2018 küm April 2 nü atsüngdoka liasü aser Abiy Ahmed Ali Ethiopia Ato kilonser aküm. Ethiopia nung ajaki Abiy sak teimla yua liasü saka mapang tatsüka tsüngda Abiy Ahmed Ali-i Ethiopia nung ashioktsü."

Kasa shidi nungjisa southern Ethiopia nung nisung million 1 shi jenshiba, Orthodox Khristan aika tepseta indokba, Tenla kitem raksatsüba aser Amhara lisopurtem jenti tepsetba densema meimchir temeden alema inyakba tatalokbatem aika shia lir.

Taküm January ita nunga temeshi ozüing süngden yua aliba Ethiopia Orthodox Arogo Tenla kidang nisung 750 shi tepseta liasü.

ANOGO ABEN TSÜNGREM DEN

Mulungsentsü ajunga agi

"Aser Kibuba ne Tsüngremi ne mulungjang ajunga agi, aser ne taküm ajunga agi, aser ne mulungsentsü ajunga agi, aser ne tashi ajunga agi nai pa meimang". Mk. 12:30

Khünü Kibuba Yisu dangi Yihuda nung ozüing meteter rongnung tezülur ka arua ozüing rongnung tulutibaji koba asütsü ta asüngdangba indang angur.

Par Yihuda nung tejen yimsü ozüing noklang troksür ter asem (613) agi khangbanger kija, kibong aser tamanger lokti ajunga nung item ozüngtemji Tsüngrem kümdaktsür lia aruba mapang ka nung Yisu-i item tesayuba anema aiben jembiba indang Laishiba nung lepa angur. Yisu Khrista mapang nungji yimsü nung tanishirtemi anir tamangertemji (Yihuda nung)- tema tereprangtsüsüjibo kanga tobur tajung saka temulungjang telung nungbo tesembatsü mapatem agi sünger alibatemi ngua itemji temeim mapa benshiba nem melenshidaktsünübaji Pa taginüba liasü.

Tanü asen tamangertem jenjang ya reprangra Yihuda nung Farisi, Saduki aser tezülur anemsübatem mesük, asenok tema tereprangtsübo kanga tajung, saka temulungjangbo Tsüngrem nungi talangka pilaa oadokba takümtem, arung mulungsentsü aika adenba tamanger ka masü, saka Yisu-i ashiba O nung azüiter amangdi. "Aser Kibuba ne Tsüngremji ne mulungjang ajunga agi, aser ne taküm ajunga agi, aser ne mulungsentsü ajunga agi, ne tashi ajunga agi nai Pa meimang".

Sarasadem

Kibuba ni kü mulungjang, kü taküm, kü mulungsentsü aser tashi ajunga agi Na meima Ne dak amangtsü tangatetba nung jajatsü yariangma. Amen

Tenla ki amakba ken o nung Khristanemi Sri Lanka sorkar aitsü

April 21, 2021: Bodhbarnü (April 21, 2021) Sri Lanka nung Roman Catholic Arogoi, küm ana tejaklen Easter Sunday nü Tenla ki ana den hotels amakdang nisung 279 tepsetba ken o junga bushisüngdang masür, ta shia sorkar aitsü.

Islamic kiralongrartemi bomb amshia hotels aser Tenla kitem amakba sülen anogo ishika tsüngda nisung 200 dak tema pua liasü, ajisüaka tang tashi iba ken o nung nisung shinga aija mali, ta pai metetdaktsü.

Easter anogo nung bomb amshia amakba tatalokba sülen küm ana ajungba anogomong amongdang Cardinal Malcolm Ranjith-i, sorkari iba tatalokba junga bushisüngdangba masüba agi ni kanga mepelar, ta metetdaktsü.

Bodhbarnü linük yimtiba, Colombo nung iba tatalokba bilemteta aser asürtem nem akhüm agüja amongba sentong nung jembidang pai, "Iba ken o junga bushisüngdang masüba ajanga shingaija iba ya mezüingshiba kuli sayur," ta ashi.

Paisa sorkar dang, tekaraba nung aibelenertem nem temerenshi agütsüsüla, ta ashi.

Tamalen-a pai, lendong ataloktsü, ta jelia sorkar nem tekümdangtsü osang

metetdaktsür liaka sorkari iba tatalokba menokdangtet, anungji Sri Lanka Tir, Maithripala Sirisena anema ken o akatsüla, ta metetdakja liasü.

Iba lendong atalokba sülen Sirisena-i iba tatalokba bushisüngdangtsü atema tetuyuba agütsü, aser ibaji ajanga, anogo 17 jelia India-i Tir aser intelligence officials nem tekümdangtsü osang metetdaktsür liasü ta jangja.

Sirisena-i November 2019 election nung metoktep saka tang pa legislator inyaker.

Iba ken o dak sendakba nung pua alir 200 nungi shinga maitsü saka 2018 küm December ita nung Buddhist nung kürakyanglutem raksatsüba ken o nungbo Mongolbarnü Muslim nung 16 anema ken o benokogo.

Buddhist nung nütsüng timba aliba linük- Sri Lanka nung Easter Sunday nü kiralongrartemi amakba sülen ita pezü lir Buddhist nung kürakyanglutem raksatsüba liasü.

Küm ana tejaklen bomb lendong nung St. Anthony Arogo Tenla kidanga nisung 56 asü aser Bodhbarnü Cardinal Ranjith leniba nung asürtem bilemtetba sentong agi.

Kasa lendong nung bendangertema 45 asü.

OLONG PAITEP # 5789

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

- | | | | |
|---|--|--------------------------------------|--|
| TIPIEN | | LANGTSÜNGLEN | |
| 2. Teburtemi tejak nung awaba - (8) | | 1. Temejangdak - (6) | |
| 6. T _ _ _ em - (3) | | 3. Nisung ka mapa inyaksü nübo - (4) | |
| 8. Tzük ayudak - (3) | | 4. Azüntsü asoshi mejemba - (6) | |
| 9. Nüngdakba dang timba - (6) | | 5. Tesangwa agütsüba - (5) | |
| 11. Züina ao - (4) | | 7. Tila masü - (4) | |
| 12. Yangi tzü angur - (5) | | 10. Tebenjem tetsür chanu - (4) | |
| 14. Tangar dang nungi tali - (4) | | 11. Tekolak nung inok - (4) | |
| 16. Senyong masü - (6) | | 12. Tetsüngda - (6) | |
| 17. Oadokdi - (3) | | 13. Tangar inyakba ka inyak - (6) | |
| 18. Tzü tarok - (3) | | 14. Tim masü ta ashi - (5) | |
| 19. Yimtaklir aikati iba ya ki den külemi yanglusemer - (8) | | 15. Asalendong - (4) | |
| | | 16. Tanü dangtsü - (4) | |

OLONG PAITEP # 5788 TELANGZÜBA

- | | |
|---------------------------------------|--------------------------------------|
| TIPIEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. Teronem, |
| 14. Ola, 16. Talak, 17. Mazük. | 12. Sempa, 13. Jahaz. |



DEACON ALOKBA-I ENGLISH AGI AYONGZÜK

Menden : Tang iba mapang nung Deacon Alokba nem tayongzükba o jembitsü mapang minute pungo (5 mts) melar.

Alokba : Ni asenok den Ao oshi agi tatsüka aser Englishi oshi agi tatsüka ta jembitsü...kechiba sura onok Deacon-tem rongnung English oshi jembitetba-bo ni dang lir...Anungji teloki aremzüka atadaktsünur. Pa nem minute-5 agütsüba Ao aser Englishi agi jembidang minute-3o agiadok.

Menden : Asen lenir Deacon Alokba-i tayongzükba o tajung aika agi lokti ayongzükogo...teloki teka tashi agi mahdena agizükdi...Ajisuaka tarutsü nungbo Aor sentep nungbo...shia meteta aliyongjia asen Ao oshi agi dang jembid nungbo kanga ajungtsü.

Lilir : L.Kika Pongener.

TANÜBO NAI LANGZÜANG

Q. Pakistan nungger Cricket asayar shibai tawa ICC ODI ranking nung India nungger Virat Kohli ajateta lir ?

Babar Azam Hasan Ali Mohammad Amir Fakhar Zaman
(Taruba adok nung onoki langzüksü)

YASHI ADOK TELANGZÜBA : 2024

AO OSHI ANGAZÜKDAK:
TANÜ ANGAZÜKTSÜBA OJANG

Bentsü
(v) tangar atema bener aoba (carry for others)
* Onoki tanurtem asoshi amtsük tanang tera **bentsü**.

Bentsü
(v) tetsür numeden nung tanur tangloksüba (impregnant)
* Pai la dak tanur **bentsü**.

Happy Birthday

TENUNG : TSUNGCHILONG JAMIR (AKHOYA)
TASOBA ANOGO : 22/04/2019
KUM : 2 (two)
TALIDAK : KUDA 'B' DIMAPUR

Tsüngrem taochi agi jabaso Tsüngchilong küm ana ajungba anogo tashi temoatsüma nung anir aruba asoshi Tsüngrem nem tenüngsang agatsür. Maneni jabaso anema aliba den arishi talang moajang ta tsurabur aser kinunger ajaki Tsüngrem dang sarasademtsür.
"HAPPY 2nd BIRTHDAY"
- Temeim Oja, Oba, Atsa, Otsu, Obu aser kinungertem.

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

SUDOKU # 5832 TELANGZUBA # 5831

9	5		4	2	8	3	6	9	4	3	5	7	1	2	8	
6	4	3	8	7			2	1	8	6	4	9	7	3	5	
	2			6	7	5	5	3	7	1	8	2	6	9	4	
3	8		7			9	4	6	9	8	2	3	5	7	1	
	9	5	2	8	4	6	7	8	7	3	5	9	1	2	4	6
		4	9		3	8	1	2	5	4	7	6	3	8	9	
2						5	9	5	1	2	3	8	4	6	7	
		8	2	4	6	9	7	7	4	2	9	6	5	8	1	3
			3		2		3	8	6	7	1	4	9	5	2	

OJANG LUTEP # 5376

- BATENG :
- GIA :
- SARAA :
- SHITMEET :
- GURMAN :
- BODEN :
- MAAKONG :
- ÜOST :
- EDENMLOKA :
- MBIMEJE :

OJANG LUTEP TELANGZÜBA # 5375

TELOK NUNG SHISATSÜ TAJUNG AGÜJA JEM BIDANG MEMETETI
KARBO TEMULUNG YIRUADOKER

TAN HOPTA ATEMA - KOMA SÜLA ?

Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?



April 21, 2021 nü Jammu nung tasümang arongba tesem ka nung Health worker temi coronavirus tashidak agi shiranga asürtem tasümang süngden agizükba noksa nung angur. Coronavirus nokdangtsü atema Jammu & Kashmir kübok municipal aser urban local body limits ajak nung aonung curfew ozüng benokogo.

Nashik hospital nung oxygen tanker leak asüba agi nisung 22 asü

Pune (Maharashtra), April 21 (Agencies): Bodhbarnü Nashik nung aliba Dr. Zakir Hussain Hospital nung oxygen tanker ka nungi oxygen 'leak' asüba agi oxygen agi kanga anünga life support agia coronavirus agi shiranger nisung 22 tashi süogo.

Oxygen tanker nungji 'valve' timtem adoka oxygen leak asü, aser mapa nung zübazülemba bushisüngdangtsü atema tuyuogo, ta State Health Minister, Rajesh Tope-i osangbener nem metetdaksü.

Bodhbar anüngdang oxygen tank ka nungi oxygen leak asüba ajanga oxygen supply ghonda tesadang ka shi magütsütet, aser ibaji ajanga coronavirus agi mejungi shiranga ventilator support tagidakpur nisung 22 asü.

State Health minister, Tope-i ashiba agi, coronavirus agi

teshirangdakpur 157 iba hospital nungji treatment tagidak liasü aser parnok rongnungi nisung 61 bo kanga mejungi shiranga oxygen kanga nüngdaka liasü.

Iba tatalokba sülen hospital mezüng semdang Shiv Sena lenir, Sudhakar Badgujar-i, asürtem ano timba akümtsüa akok, ta ashi.

Nashik District Collector, Suraj Mandhare-i, "Oxygen tanker ji nija ka meyong liasü. Low pressure ajanga timtem adoka oxygen leak asüba mapang nungji technician temi valve ji yanglushitsü merang. Oxygen leak asüba agi ventilator support agir nisung 22 asü. Asür kibongtem den ni mangyim jashi lemsateper," ta metetdaksü.

"Iba tanker ji yanglushiba sülen tang tanüngba teshirangdakpurtem nem oxygen agütsüdar. Parnok junga dang lir

ta medical ketdangsertemi metetdaksüogo," ta Mandhare-i ashi.

Osangbener den jembidang BJP züngsem aser Legislative Council nung Opposition Lenir, Pravin Darekar-i, iba ya Nashik civic body ketdangsertem tamakok ajanga lir, anungji NMC Commissioner anema ken o benoktsüla, ta ashi.

"Iba tatalokba atema technician nem tai metongloksütsüla. Iba ya NMC ketdangsertem aser state sorkar tamakok ajanga lir," ta Darekar-i ashi. BJP lenirisa, "Iba tatalokba nung politics masayatsü. Iba ya NMC ketdangsertem tamakok ajanga lir," ta ashi.

Tang Nashik district nung coronavirus agi teshirangdakpur 45,000 lir aser district nung iba tashidak agi nisung ajak agi 2,672 süogo.

India nung ano nisung lakh 3 jungnüa dak coronavirus putetogo

New Delhi, April 21 (Agencies): Tesüiba ghonda 24 tsüngda India nung ano nisung 295,041 dak coronavirus tashidak putetogo aser iba tashidak agi nisung 2,023 süogo; India nung iba tashidak prokba sülen tang tashi nung anogo ka kija nung nisung timtiba dak iba tashidak putetba aser timtiba asübaji ibai lir, ta Bodhbarne Union ministry of health & family welfare-i metetdaksü.

Tang ano nisung 2,95,041 dak

iba tashidak putetba sülen linük nung iba tashidak agi teshirangdakpur lakh 21 jungogo, ta Health Ministry-i metetdaksü.

Tesüiba anogo 42 tashi linük nung iba tashidak agi teshirangdakpur timba-timba kümdar aser tang teshirangdakpur 21,57,538 jungogo.

Linük nung coronavirus tashidak agi shiranger shilem 85.01 (nisung 1,32,76,039)

anepogo aser iba tashidak agi asür shilem 1.17 dang kümogo.

April 19, 2021 nü linük nung iba tashidak agi shiranger crore 1.50 junga liasü, ta Union ministry of health & family welfare-i metetdaksü.

Bodhbarne ICMR-i ashiba agi, linük nung tang tashi nung coronavirus samples ajak agi 27,10,53,392 tendangogo aser iba nungji April 20 nü samples 16,39,357 tendangba densema lir.



April 21, 2021 nü Thane nung police-i shishilembartem aser dokan kiburtem dang ketdangsertemi tuyuba COVID telatetba nung ajemdaker dokantem shibangtsü tuyuba noksa nung angur.

MENUNGRA BILEMTETER



C. Masalepden Jamir
22/04/2020 - 22/04/2021

Nai onok toktür orr tanü küm ka ajunger, Ne temeim mapa tajungtem onoki teti menungra bilemteter aser iba akümüli nung na onok den meliaka onok mulungjang nung na teti lir.

Tanü na sür küm ka ajungba anogo bilemteta menungraseta sarasadema amonger.

~ Temeim Chirurtem aser Kinungertem.

Linük troki India linük nungi aruba nokdang

New Delhi, April 21 (Agencies): Tang India linük nung coronavirus tashidak kanga prokba nung ajemdaker linük aikati sensotem dang India linüki maotsü tekümdangtsü metetdaksüba den külemi India nungi aruba nokdangogo, ta osang ka ajanga metetdaksü.

Linük trokji- US, UK, Singapore, New Zealand, Hong Kong aser Pakistan lir.

Hombarnü US Centres for Disease Control and Prevention (CDC)-i America nunger dang nenoki vaccine agir liaka India-i maotsüla, ta metetdaksü.

CDC-i, "Tang India tensa nung ajemdaker vaccine agir liaka Covid-19 variants menazüka prokba nokdangtsü atema India-i maotsüla," ta metetdaksü.

UK Ato kilonser, Boris Johnson-i India semdangtsü aliba thinenba sülen ghonda ishika tsüngda UK-i 'Britain travel red list' nung India züngok.

April 23 nungi tenzüka British aser Irish passport-holders dak alaka tangartem India-i aoba mesüra India nungi aruba memelatsü.

UK Ato kilonseri taruba hopta India semdangtsü aliba agi 'red list' nung India mezüngoki liasü ta aikati bilemer, saka pai India semdangtsü aliba

thinenba sülenbo India 'red list' nung züngokogo.

Mongolbarnü Singapore nung health ministry-ia India nungi arurtem ajak anogo 14 quarantine asüba sülen anogo tenetnü kidang mongdaksütsü, ta sangdongogo.

New Zealand nungbo coronavirus agi shirangertem kanga ajema lir, ajisüaka India nungi arurtem nokdangba mezüng linükji New Zealand lir. April 8 nü New Zealand Ato kilonser, Jacinda Ardern-i, hopta ana tashi India nungi arurtem nokdang, ta sangdonga liasü.

Hong Kong-ia Mongolbar nungi tenzüka India, Pakistan aser Philippines nungi arurtem nokdangogo. Linük asem ya "extremely high risk" nung züngoka linük asem nungi arurtem nokdang. Hong Kong ketdangsertemi ashiba agi, New Delhi nungi tayimtsü ka nung Hong Kong-i arur passenger 53 dak coronavirus putetogo, ta metetdakja liasü.

Pakistan-ia hopta ana tashi India nungi arurtem nokdangogo. Pakistan National Command & Operation Centre-i India ya "List of Category C countries" nung züngoka India nungi tayimtsü mesüra lenmang ajanga arurtem nokdangogo.

Centre sorkari healthcare workers nem PMGKP scheme agütsütsü

Puducherry, April 21 (Agencies): Indian Medical Association (IMA) den Villupuram nungi MP, D Ravikumar aser tangartemi mepishiba agizüka Centre sorkari coronavirus anema raradang asür healthworkers kibongtem nem maneni Prime Minister Garib Kalyan Package (PMGKP) insurance scheme agütsütsü, ta metetdaksüogo.

Coronavirus wara anema raradang health workers süadokra par/lar kibong nem iba scheme kübok senotsü teyari lakh 50 tashi agütsütsü.

Hombarnü Union health ministry-i New India Assurance Company Limited (NIACL) dang PMGKP scheme ji April 20 nungi mapa küma inyaxtsü metetdakja liasü.

Health & family welfare

services deputy secretary, S Nayak-i shidi ka ajanga NIACL deputy general manager, Jitender Mehndiratta dang coronavirus anema rarar healthworkers süadokra parnok kibongtem nem Prime Minister Garib Kalyan Package (PMGKP) insurance scheme agüjang, ta tuyuogo.

Yaküm March ita nung Centre sorkari iba scheme ya tenzüka liasü saka taküm March ita nung iba scheme anenadok.

Mezüngbo Centre sorkari iba scheme anener tanga teyari dang agütsütsü telemtetba agi, ajisüaka IMA aser Villupuram MP, Ravikumar nungeri Centre sorkar dang iba telemtetbaji reprangshiba sülen maneni PMGKP scheme agütsüdaksün, ta mepishiba liasü.



Kuwait City, Rongchii/April 21: Hawalli Governorate, Kuwait nung aliba Kuwait Vaccination Center nung nūburtem COVID-19 mozū agitsū nokdaktepa aliba noksa nung angur. COVID-19 tashidak prokshiba azüoktsü nūkjidong nung Kuwait-i Ramadan matem tashi 'partial curfew' benoka aliba amshitsü, ta Kuwaiti sorkari sangdongogo.

Nigeria nung kaketshir aika pua bener ao

Kaduna, Rongchii/April 21 (Agencies): Nigeria northwest tsütsü anisüngzük maliba Kaduna state nung university ka nung nisungpur temi nisung ka tepset aser aika pua bener ao, ta police temi Bodhbarnü ashi, kong kaket reju nungi nisung pua bener aoba tang ya tasen masü.

Telungpurtemi December ita nungi northern Nigeria nung school aser university nung timtem agüja sen yong alangzüktsü mechi kaketshir 700 dak tema pua bener ogo.

Sorkar aser security forces temi West Africa linük nungya iba ama azüdokshi aser mapa tamajung azüoktsü makoker.

Prangbong bener nisung apurtem ya Kaduna nung aliba Greenfield University-i

Mongulbarnü 8:15 ako (par mapang) meta aru, ta state police odongtar Mohammed Jalige-i osangbener dang telephone ajanga ashi.

"Iba university nung staff ka khaset, saka kaketshirtem kwi pua bener ao'ar ano mejangjateter," ta Jalige-i ashi aser police temi Bodhbar nikonddang tashinung tejangja metettsü, ta ashi.

Nisung apurtemi kaketshir tebur 17 apu, ta university nung inyaker kati ashi.

Greenfield University nungi tang tashi osang kecha sangdonga mali.

December ita nungi tenzuka kaketshir noklang aika pua bener aoba ya northwestern Nigeria nung timba ataloka lir.

Iba region nung sen agi alangtsü mechi nisung pua bener aoba ya kanga bulua ataloker. Tir Muhammadu Buhari-i February ita state sorkar dang nisung pua bener aor nem sen aser gari agütsüba sentong tanaben reprangshitsü ajungshi aser iba sentong yagi nūbur ang tali akoksatsü, ta ashi.

March ita lendong agütsürtemi Kaduna nung forestry college ka lungbanga liasü, aser iba college anasa military academy liaka kaketshir aika pua bener ao.

Parnok ya ita ka dak tema pua yur sen million naira 17 (\$44,620) agüja kaketshir ter alangzük aser tanungba kaketshir tang tashi mechioki yua lir, ta tsürapur kati ashi.

Pakistan nung osangbener ka dak injang agi akha

Islamabad, Rongchii/April 21 (Agencies): Mejangjaba nisungtemi Pakistan osangbener tejen ka dak Mongulbarnü Islamabad nung par ki anasa senzüba mapang akha. Absar Alam, shiba Pakistan Electronic Media Authority (PEMRA) nung mendenpuba inyaka liasü, pa ya mozü kidangi anir ao aser yangji anepalua tang tajungba lir.

Alam-i iba lendong ya video message ka nung jangjatsü, koba Twitter nung inoka liasü. "Kü tesaret nung injang khaloktsü, saka ni teimla mesama. Shirnoki küdak iba mapa ya inyaka, ni nenok dang ya shiner, iba amala yimya agi ni tsüpua malitsü," ta Alam-i ashi.

Tang tashi iba lendong asoshi shingaiia tenung agia mali. Iba ken o bushisüngdangtsü atema Islamabad Police-i telok ka tentetogo.

Iba telok dang lendong nung dena alir tsüngsü aputsü asoshi scientific aser forensic yimya ajak amshitsü totuyuba agütsüogo, ta Islamabad Police ajanga tweet ka nung ashi. Federal Minister for Information and Broadcasting Fawad Chaudhry ajanga Twitter sangdong ka nung iba tatalokba ya aitsü aser police dang bushisüngdangtsü shiogo, ta ashi.

PML-N Vice-President

Maryam Nawaz-ia iba lendong aitsüba mapang, pei tebilemba lemsateper indang ola ajemdaktsütsü merangba ya cancer ka lir, koba agi linük nung küm aika timtema aru, ta ashi. "Iba ama tebilemba tamajung nung inyaksangshiba ajangshir rongnung Absar Alam ya tesüsaba lir. Tsüngremi pa zübu aser iba linük zübu anepjangma," ta lai ashi.

Pakistan Peoples Party Chairman, Bilawal Bhutto-Zardari-ia iba tatalokba aitsü aser iba lendong nung shilem agirtem aputsüla, ta takhangba agütsü.

Osangbener tejen ka tepsettsü merangba atema Human Rights Commission of Pakistan-ia kanga sashia aitsüogo. "Osangbener anema iba ama tasümaiz azüdokshi mapa inyaka ya pei tebilemba aser tangatetba lemsatsü nokdanga aliba nung ano asendenshir amokmerenba amai HRCP-i angateter," ta ashi.

Osangbener asoshi lendong tulutiba aliba linüktem rongnung Pakistan ya ka ta züngshir. 2020 küm linük nung osangbener tajemba agi nisung ter tepsetogo aser aika amokmeren, pua bener ao aser reshikangshia amshio, ta Council of Pakistan Newspaper Editors (CPNE) ajanga Media Freedom Report 2020 nung shia lir.

Myanmar nung nisung 250,000 jungnüa pei ki yutsür prokshia lir

Naypyitaw, Rongchii/April 21 (Agencies): Myanmar nung mitkartemi sorkar atsüngdokba anema longkak aiter dak mitkartemi tashiyim amshia azüdokshiba ajanga nisung 250,000 jungnüa pei ki yutsür tesem balala nung jenshia lir, ta United Nations rights envoy ajanga ashir, kong February 1 nü mitkar temi sorkar atsüngdokba mapang apurtem ajunga chiokang, ta activist temi ola adoker.

UN special rapporteur for Myanmar, Tom Andrews-i ano maneni linük balala dang mera agitsü Bodhbarnü ayongzük aser mitkar temi azüdokshiba mechi Myanmar nūbur 250,000 jungnüa tesem balala nung jenshiba osang angazüka süngmanger, ta ashi.

"Iba nisung meimchir timtem angateta alimai tekeratiba nung mera agitsüla," ta pai ashi.

Mitkari tashiyim amshia sorkar atsüngdokba jembitsü atema Indonesia yimtiba, Jakarta nung kidanger linüktem Honibarnü senden amentsü lia iba osang ya angashir.

Züngsem ter aliba Association of Southeast Asian Nations (ASEAN) ajanga külem züngsem Myanmar ya sorkar atsüngdokba mechi azüdokshi tenzükba nungi anitetsü meranger, saka iba telok indang pangzüng nung dangar linük yimtenren nung teka aitsü nokdanga aliba ajanga sepaitemi civilian noklang aika

tepsetba atema telangzüba agütsütsü lenmang monguteter.

Iba senden nung Senior General Min Aung Hlaing adentsü, ta mitkar indang odongtar kati Bodhbarnü ashi.

Tang tashi Myanmar mitkartemi kidanger linüktem den iba ken o jembitsü molunga aliba mesayur aser parnoki February 1 nü atsüngdokba sorkar züngsem den jembitsüa tejangraba majiteter. Parnoki atsüngdokba sorkar ketdangsurtemi ashikülak mapa inyaka lir, ta mitkartemi tai tonglokja lir, aser iba aibelen asoshi tasüba agi merenshitsü.

Assistance Association for Political Prisoners (AAPP) ajanga ashiba agi, sorkar atsüngdokba sülen sepaitemi nisung 738 tepsetogo aser tang nisung 3,300 pua lir, aser item rongnung nisung 20 nem tasüba temerenshi agütsüogo.

Bodhbarnü nūburtemi social media nung anüng sentsü tula semer teka nung pua alirtem tenung zülur aliba noksa sayuogo. Tula ya democracy busemer Win Tin tenung nung asema lir, shiba mitkartemi küm 19 tashi tepuokdak yur April 21, 2014 nung asü.

Pa chiokba sülen yimtenren mechi pua alir ajunga mechiok tashi anüng sentsü tula asemtsü nangzuka liasü.

"Imlibilema ola adokang aser mitkar yimsüsüba kübok tim masüba nung pua aliba nūbur ajunga chioktsü asoshi

takhangba agüjang," ta longkak aitba lenir Ei Thinzar Maung-i Facebook nung ashi.

Sorkar atsüngdokba sülen mitkartemi nisung meyrirjang aika tepuokdak nungi chiokogo, saka item rongnung longkak aitba den sendaktepa alirbo ishika dang lir. Mitkar temi busema television broadcaster MWD ajanga Mongulbarnü sangdong ka nung, mitkar anemertemi tentetba National Unity Government (NUG) ya ozüng agi memelaba ta home affairs ministry ajanga sangdongogo, ta ashi.

Parliament züngsem nungi mitkartemi indoker alirtem densema democracy busemer yimten yimsüsürtemi taoba hoprta NUG tentetba

sangdonga liasü, kong Myanmar lenir aser Nobel Peace Prize angur Aung San Suu Kyi densema lir, shiba sorkar atsüngdokba anogo nungi tepuokdak yua lir.

NUG ajanga parnok ya Myanmar nung tetemsü ketdangsur ta sangdong aser linük balala dang parnok ya agizüka Jakarta senden nunga parnok jaoktsü shia liasü.

ASEAN züngsema telok kati NUG ya jaoktsüla, ta ashir.

"National Unity Government den mejembi aser parnok nungi mangashi tashi ASEAN ajanga Myanmar tensa indang junga mejembitetsü," ta ASEAN Parliamentarians for Human Rights ajanga ashi.

Sangdong ajangasa,



George Floyd asüba ken o nung taoba Minneapolis police Officer Derek Chauvin aitsüba sülen Washington nung aliba White House nung US Tir Joe Biden-i osangbener den jembiba mapang tangokba noksa nung angur. Noksa nung Joe Biden sülen Vice President Kamala Harris nokdaka aliba angur.

Assam Rifles-i sentong balala ayongzüka agi



Dimapur, Rongchii/April 21 (TYO): HQ IGAR (North) tawabangka kübok Assam Rifles Tuensang Battalion-i April 18 nü Tuensang District nung Yangkhao yimtsüing nung angati medical camp ka ayongzüka katsüogo.

Iba camp ya yimtsüing nung tantsür tamburtem, matamabensartem, lajar aser tetsür shirnok temang anepalutsü atema tesem talangi mozüki bushia moteter parnok nem talisa teyari agütsütsü nükjidong nung ayongzüka.

Camp mapang nungdakba yimdaklirtem temang anepalutsüba den angati mozü agütsü aser parnok nem mapang shidak nung vaccine agütsü nungdakba aser merekmeju alitsü koda tongtibang iba indang tangazükba agüja liasü. Camp ayogzüka katsüba ajanga tetsür 28, tanur 26 aser tebur 32 ajangzükgogo.

Kasa mapang nung Assam Rifles Zunheboto Battalion-i Operation Sadbhavna kübok, Zunheboto jila aser temeket

nung aliba yimtsüingtem atema April 19 nü Veterinary camp ka ayongzüka katsüogo.

Iba Veterinary camp ya Mobile Veterinary Hospital aser Battalion Hospital, Zunheboto Battalion nungi doctor aser staff temi achaayanga katsü.

Iba camp ya local tem kisetshiruru kümzüka ayutsü atema nungdaktem peridaksütsü nükjidong nung ayongzüka agi. Tsüingsang mejungaka nüburtem aika adenshia camp akaba tajangzüka agiogo.

Camp nung mozü angati agütsü aser shirururtem nem vaccine agütsüba den kisetshirurtem merekmeju ayutsü atema tangazükba agüja liasü.

Maneni Assam Rifles Jalukie Battalion-i, April 19 nü Peren District kübok Govt High School Heningkunglwa nung COVID - 19 Awareness aser merekmeju sentong ka ayongzüka agi.

Sentong nung kaketshirtem nem COVID-19 tashidak menar tali küma aoba indang metetdaksü aser merekmeju alitsü nungdakba indang

lemsatep. Parnok dang mask asemtsü aser sanitizers amshitsü asoshi metetdaksüba den pei talidak aser kibongtem nung item tangazükbatem prokshitsü ajungshia liasü. Nüburtem ajangzükdaksütsü atema iba amala sentong ayongzüka agiba atema school aser yimdak ketdangsürtemi AR dang kanga pelaba lemsatep. Iba sentong nung kaketshir 42-i shilem agia liasü.

Ano Assam Rifles Jalukie Battalion-isa Khelo India Campaign nung shilem ka ama, Peren jila nung April 19 nü multi utility sports stadium ka yanglushitsüogo.

Peren Town Youth organization den longjemer iba sports complex yanglushiogo. Sports complex yanglushitsüba ajanga lanurtem saisapong nung temulung agütsütsü aser parnok sempettem arangtetsütsü atema atsüa arutsü. Assam Rifles temi lanurtem maneni len aniba atema jila nung aliba lanurtemi parnok dang kanga pelaba lemsatepogo.

Poco M2 smartphone India nung sayaogo

Rongchii/April 21, 2021 (Agencies): Poco company-i India nung Poco M2 Reloaded sayaogo. Iba smartphone tasenba ya original Poco M2 dang nungi dalangba, koba 2020 küm September ita sayaa liasü.

Phone terprangtsüba taoba mapang den kanga mesekteper saka tilateri kar melenshir lir. Phone tasenba nung MediaTek Helio G80 chipset dang inokja lir saka 4GB RAM aser Full-HD+ display keter sen 10,000 tekübok nung angutsü. Poco M2 sayaba sentong ya virtual event ka dang liasü, kechiyong India nung COVID-19 tashidak kanga kara prokshia odar.

Design tsütsü phone nung waterdrop-style notch display

asertesülen original Poco M2 den mesüktepa quad camera inokja lir. Phone tasenba ya Greyish Black aser Mostly Blue sentsü nung agutsü. Poco M2 Reloaded nung 6.53-inch screen den Full-HD+ resolution, Corning Gorilla Glass 3 layer inokja lir.

Phone nungsa octa-core MediaTek Helio G80 SoC den 4GB RAM aser 64GB internal storage keta lir, koba microSD card ka amshia maneni atsülangtetsü. Maneni phone indang OS-i Android 10-based MIUI 12 asütsü aser dual-SIM cards (Nano) support asütsü. Dual-SIM tray nung microSD cards slot ka keta aliba angutsü.

Camera dak sendakba nung iba phone nung 13-megapixel

primary camera ka, 8-megapixel ultra-wide-angle camera ka aser 2-megapixel shooters ana inokja lir.

Phone nung tanga feature tem rongnung 4G LTE, dual-band Wi-Fi, Bluetooth 5.0 connectivity, IR Blaster, GPS, aser 5,000mAh battery den 18W fast-charging support densema lir. Battery ya USB Type-C port ka ajanga charge asütsü.

India nung Poco M2 Reloaded ya sen 9,499 agi angutsü, ajisüaka original Poco M2, 64GB aser 128GB storage variants ya maneni sen 10,499 aser 11,499 agi yokdar. Variants anaprongla nung 6GB RAM keta lir. Iba phone ya Flipkart nung alitetsü.



Mapang talangka nungi yongyaa ataa aliba Bodhbar bazaar April 21 nü EAC Shamator, Chenithung Ovung-i lapoktsüogo. Bodhbar bazaar ya Self Employed Women Association Shamator (SEWA) indang Project ka lir, koba Shamator nung alirtem nem bendanga agütsüogo. Women Welfare Officer MSK Tuensang, Sangmao M-i iba mapa tajung pelashishia agizükogo aser shishilembartem dang iba maangka agütsü ajungshi. Shishilembadak lapokba sentong ya Secretary, SEVA Shamator Unit, T. Tsurila lenisüba nung agi aser Pastor STBC, Rev. R. Thsankiu-i iba shishilembadak bendanga agüja sarasadem. Maneni sentong nung Convenor SEVA Shamator unit, K. Ester tepela o jembia liasü.


AKÜMLI NUNGI PILAR KÜM KA AJUNGBA MENUNGRA BILEMTETER

ASÜR NÜKSHIENBA JAMIR
TASÜBA ANOGO : 22.04.2020

Temeim Oba,

Pungmang ka ama bilemaka asangsang nung nai onok toktsür oer tanü küm ka ajonger. Onok molungjang nung na teti bilemer aser amatsü makoker, nü sayubentsü O aser temeim mapa tajung onoki mamateter. Nü mapa aser tsüingsü tajungtem bilemtetdang onok temoatsü angur aser milen tesangwa ama len anir. Na onok den maliba ajanga onok kanga rongjenseter, saka na teti tepela lima ka nung lir ta amanga onok anisüngzüker. Kenü anogo asenok ajak kibuba tsüingdang ajuruteptsü sarasadema atar.

Temeim chirnur, semchirtem aser kinüngertem



Pelaba Lemsateper

16/04/2021



Onoki teti meima aliba ASÜR MRS. NGANGSHIMONGLA (Warumung) shiranga alidang nungi tasü nü tashi nung keja, lokti balala, aser temeimertem shimokisa nübo, rongsen, aser sarasadem agi yaritepogo, nenok ajak dang pelaba lemsateper. Teyanglur Tsüngremi nenok ajak maneni moajangma ta ozü sarasadem.

- Temiem Kinungbo, Chirnur, Semchirtem aser Anükapang

**In the Court
Principal District & Sessions Judge
Mokokchung : Nagaland
S/C NO. 75/2021**

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of late Maongkaba has been applied by Smti. Imkumlila W/o Lt. Maongkaba R/O H.No 47 Lijaba Lijen Ward, Mkg Nagaland for possession of:

Family Pension, P.P.O No. NL/3545, Closing of A/C.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 20.5.2021 Given under the hand and seal of the court on this the 20.4.2021

Sd/-

**Principal District & Sessions Judge
Mokokchung : Nagaland**

ALIAYOKER

Old Showuba area near Four Lane
1. Per Sq.ft. Rs. 90/- 2. Per Sq.ft. Rs.150/-
9856603713 / 9362576107

Arunachal kübok yimdaklirtem nem tap water connections agütsütsü

Itanagar, Rongchii/April 21 (Agencies): Jal Jeevan Mission

kübok Arunachal sorkari taruba küm March ita tashi nungbo yimdak yimtsüingtem nung kibong meyrejang 65 nem tap water connections agütsütsü.

Arunachal Pradesh-i April 21 nü video conference ajanga Annual Action Plan (AAP) ka sayaogo.

Sorkari-isa, 2023 küm tashi nungo Har Ghar Jal nükjidong

ataloktsü atema bendanga agütsür inyakdar ta metetdaksü.

State kübok yimdak yimtsünrtem nung kibong lakh 2.17 shi lir aser item rongnung shilem 47 shi nung tap water supply lir.

Ato Kilonser Narendra Modi-i,

2024 küm tashi nungbo kibong ajak nem tap water connection agütsütsü nükjidong nung Jal

Jeevan Mission ya 2019 küm sangdonga liasü.

Rohit Sharma dang senchi sen lakh 12 achi



Rongchii/April 21, 2021 Sharma dang senchi sen lakh 12 (Agencies): Mongolbar aonung Delhi Capitals den asayaba mapang atakzükja aliba mapang dang nungi mapang talila agiba atema Mumbai Indians captain Rohit

European Super League: Barcelona aser Real Madrid na dang anugogo

Rongchii/April 21, 2021 (Agencies): Atletico Madrid aser Inter Milan nati Bodhbarnü European Super League nungi

atsüingintsü atema telemetba agiogo aser iba ajanga iba project techireper dang lir.

"FC Internazionale Milano-i, Super League project nung par club-i shilem magitsü ta jangjashitsür," ta team-i sangdong ka ajanga metetdaksü.

China nung meyong club ya 12-team project nungi atsüingiba Italy nung club rongnung mezüngbuba lir. Kasa mapang nung Atletico Madrid yaa Spanish club rongnung iba project nungi atsüingiba mezüngbuba club kumogo.

"Atletico Madrid Board of Directors Bodhbar anepdang senden amen aser parnoki Super League aser iba league ngutetba club tanungba dang Atletico pur iba project nungi atsüingiba osang agütsütsü

Silverwood nem team nung asayartem shimtsü nongloksü

London, Rongchii/April 21 (Agencies): National selector Ed Smith mapa agintsüba sülen England cricket tebur team head coach Chris Silverwood nem team nung asayartem shimtsü atema khuret ajak nongloksüogo, ta England and Wales Cricket Board-i Mongolbarnü metetdaksü.

Smith-i National selector mapa ya 2018 kum nungi bener aru aser iba mapang nung England team-i 50-over world cup kokogo. Pai iba ita tatemi mapa toktsütsü.

Team nung asayartem ajak Silverwood-i shimtsü, ajisüaka Test captain Joe Root aser limited overs skipper Eoin Morgan natia asayartem shimba nung shilem agitsü.

Taküm England team August ita India den Test pongu, India nungsa T20 World Cup aser

atema Mumbai Indians captain Rohit Sharma dang senchi chiogo," ta IPL sangdong ka ajanga metetdaksü.

"Iba ya par team atema mezüngbuba aibelen asünung minimum over-rate offences dak sendakba nung IPL Code of Conduct dak ajemdaker Sharma dang senchi sen lakh 12 chiogo," ta kasa sangdong ajanga metetdaksü.

Kasa mapang nung leg-spinner Amit Mishra-i (4/24) ball kanga junga aonba ajanga Mumbai Indians batsman tem nem asayar 9 out ser run 137 dang yangludaksü, koba Delhi puri ball pongu anunga lia menepa asaya akok.

nunger tongti ser iba project tenzüik.

Ajisüaka Manchester City, Chelsea, Manchester United, Liverpool, Arsenal, Tottenham nung atsüingiba sülen iba project ya tasü den kasa dang kumogo.

Alima ajunga nungi fan temi aitsüba sülen AC Milan-a Bodhbarnü European Super League (ESL) nungi tuguogo.

"Alima ajunga nungi fan temi Super League dak sendakba nung parnok tebilemba lemsatepogo aser iba asaya meimertem ola AC Milan-i angatsü nungdaker," ta Milan-i sangdong ka ajanga metetdaksü.

Kasa mapang nung iba project nung tongti ser inyaka aruba Italian champions Juventus-ia, iba project ya sentong yanglur aliba ama benoka masayatetsü, kechiyong club timba atsüinginadokogo, ta ashi.

ta angateter," ta paisa ashi.

Giles-isa, Silverwood nem khuret talila ka agütsüba ajanga pai shimba asayartem junga masayara pa tali nongshitsü, ta ashi.

Kasa mapang nung Giles-i arishi kum 43 tain Smith nem akhum tetushi agütsüogo.

"Taoba kum asem tashi England tebur team atema mapa tajung aika inyaktetsüba atema ED dang kanga pelaba lemsateper," ta Giles-i ashi.

"ED-i shisatsü tajung agütsüba ajanga England team ajak nem takok agütsüogo aser national selector ama inyakba mapang pai bendanga agüja inyakogo," ta paisa ashi.

Smith-ia, "nisung tajung aikaden inyaksema ya ni atema maongka tajung liasü. England takok nung aotsü imlaja atar," ta ashi.

Tokyo Olympic Artistic Swimming Test Event thinener

Rongchii/April 21, 2021 (Agencies): Olympic Games atema artistic swimming test event July itai thinener, ta world aquatic sports governing body FINA-i ashi.

Iba asayamung ya Olympics atema tetendanga asayamung ka aser Olympic qualifying tetoktepba ka liasü, koba Olympics ayongzükertemi achaayanga asayatsü asoshi renemer liasü.

FINA-i Mongolbar aonung ashiba agi, artistic swimming Olympic qualification event koba taoba mapang March ita asayatsü renemer liasü iba asayamung ya July ita Japan nung masü saka tanga linük ka nung asayatsü ta shiogo, ajisüaka asayamung asayatsüba tesem tang tashi shima mali, ta Xinhua sangdong ka ajanga metetdaksü.

Tokyo 2020 organizing committee-i ashiba agi, Japan nung Covid-19 tensa kanga mejungi akümba ajanga FINA-i iba asayamung thinentsüsa

aküm. "Tanga international aquatics event tem aika ayongzükur aliba ajanga telok ajaki iba asayamung Tokyo nung ayongzükä asayatsü tasak asütsü ta angatetogo aser iba den May tom nung asayatsü aliba Olympic Games venue tem adapt asütsü nungdaker," ta asayamung ayongertemi sangdong ka ajanga metet daksü.

Japan nung tang agi Covid-19 tashidak pezübenbuba pokteter timtem nung lir aser anüolen aliba Osaka prefecture-i Mongolbarnü Centre sorkar dang iba tesem nung emergency benoktsü atema mepeshia asüngdangogo.

Kasaji source kar ajanga ashiba agi, Tokyo metropolitan government-ia centre sorkar dang iba hopta linük yimtiba nung emergency benoktsü atema mepeshitsü, kechiyong iba tesem nung Covid-19 tashidak menar aika kuma odar.

AR-i ayongzükä Wakching nung volleyball asaya



Dimapur, Rongchii/April 21 (TYO): HQ IGAR (North) kübok Mokochung Battalion of Assam Rifles-i maneni nüburtem yimjung nung toktsütsü aser lanur aser local tem taküm libaliro tajungba ka dangi anitsü atema bendanga agüja inyaka arudar.

Yamaji 'Fit India Movement' nung shilem ka ama Assam Rifles aser Mon District kübok Wakching yimtsüng nung aliba JNV School kaketshirtem tsüngda April 20 nü friendly Volley Ball match ka ayongzükä asayaogo.

METONGSHITSÜR

Rongchii/April 21, 2021 nü Tir Yimyim Adok 186, Tapak 10 (Saisapong Osang) nung Jangpetkong Kaketshir Telongjem Mungdang (JKTM) ajanga ayongzükba 'One Day Open Penalty Shootout Tournament' osang nung JKTM tir Aoyanger Imchen ta aliba ya Jangpetkong Senso Telongjem Dimapur tir ta melenshia azüngtsü mepishir. Aibelenba atema sasa bilemer.

BILEMDANGANG

"Jangrabangra inyakba ajak shitak inyaker ama meblemetsüla."